



春臺先生文集

前稿
一
二

丑

詩部

16
3262
2



門號卷
3262
2

冊二拾
號文
函八



春臺先生紫芝園前稿卷之一

門人



稻垣長章釋明
堤有節仲文輯

純少好著述。丁年以來。所為詩若文。頗成卷軸。享保間。寓居傳通院。辛丑三月四日。祝融為祟。烏焚其巢。僅以身免。所有書策。及服飾器玩。盡為灰塵。平昔諸所著述。編錄一字不存。夫財賄糞土。固不足惜也。書策雖可惜乎。猶可復得也。孰若所著述。編錄之為最可惜哉。蓋精神所鍾。

一喪不可復得也。雖命也奈何。亦豈能無介然於懷乎。故求其近日所與人唱酬贈遺。及行卷之在外者。於朋友故人。而隨得錄之。於曩時所喪也。不能十一而已。然暇或繙之。尚可以自娛矣。非敢謂足不朽也。竊比於賈浪仙祭詩之意云。癸卯季夏之日。書于紫芝園。

風雅

牡丹。刺在位富貴而不好德也。

牡丹牡丹。華大無臭。非無臭。于嗟不可嗅。

牡丹牡丹。華大無實。非無實。于嗟不可食。
牡丹之苞。碩大且茂。克明爾德。以保其後。

牡丹三章章四句

有鳥。孝子流離。不得養其父母也。

有鳥在野。集于苞栩。彼其之子。不得將父。

有鳩在里。集于苞杞。彼其之子。不得將母。

鳥則有室。獸則有穴。父兮母兮。曷維其佚。

有鳥三章章四句

中丘。刺為邦弗用賢也。

中丘何有。維荆與榛。君子在位。不憂其民。
 中丘何有。維荆與棘。君子在位。不治其國。
 中丘何有。維荆與楚。君子在位。不念其祖。
 縫衣縫裳。維婦克之。牧牛牧羊。維奴職之。君子為政。
 必待賢聖。
 藝麻藝菽。農夫之令。斲軫斲輻。必召工人。君子為政。
 何用童蒙。

中丘五章三章章四句二章章六句

樂府

子夜四時歌

遲日媚麗景。風來發新芳。佳人不下機。春心先已傷。
 濯熱初成妝。相迎上高堂。安得涼風起。吹歡羅衣裳。
 木落風復悲。秋蘭香堪摘。情人不可見。流月過牕隙。
 綠池水始冰。如我同心結。許身比松柏。那知畏霜雪。

烏栖曲

落日餘曛照牕紗。衆鳥栖宿似歸家。門外吠客何處
 犬。呼燈分明見郎面。
 城上烏啼東方白。立攬子祛臆如炙。千條弱柳儼垂

絲無由綢繆長若斯。

青衿雍雍上驂騑。童僕行色思悠悠。顧視玉籠謝鸚

鵡。含情不語淚如雨。

左臂蒼鷹右玉鞭。日晚驅馬渭橋邊。妾在樓上咨嗟

久。即今斷腸君知否。

四言

牛門集詩

駢彼飛隼。集于中林。未見君子。怵怵勞心。既見君子。秩秩德音。和樂飲酒。鼓瑟鼓琴。鼓琴吹笙。起舞婆娑。

爾酒既旨。爾殽既多。威儀棣棣。碩人之邁。愛之敬之。作此好歌。鶴鳴九臯。聲聞南北。既盡我心。又竭我力。天之蒼蒼。民各有職。黽勉同術。以遵天則。

五言古

湖上送別

送君湖上路。攜手湖水濤。湖水闊萬頃。湖水深千尋。萬頃似君懷。千尋比我心。宇宙何茫茫。人世少知音。匠石歎無質。伯牙破壞琴。不見季布信。一諾勝百金。名譽何足道。令德獨所欽。攀轅且相留。春酒聊堪斟。

臨別忽忘言。永嘯復長吟。去矣客行士。匪勉惜光陰。

悼從母

并序

余外王考清水府君。無男有二女。其長即余先妣也。其少在家。即余從母也。府君以是妻其義男中村氏子。以為嗣。從母少多病。年二十生男。不育。後不復孕。壬辰五月壬子晦。以疾歿。年三十一。其母谷田氏猶在。其哀為如何哉。及從母之疾病也。予亦有疾。不能往視之。聞赴。力起奔喪。則既葬矣。哀哉。予實有罪。聊作詩以自責云。

梅天晴復雨。溽暑人共苦。姨母病不起。冉冉去此土。壬子既屬纊。神魂歸冥府。哀哉阿姨氏。少小早喪父。獨有慈母在。與居更相怙。長為村氏妻。當初孕不乳。賦性溫且惠。從夫持門戶。行年三十一。譬如日未午。奄忽不見面。名字入鬼簿。有家無子孫。喪事誰是主。從來欠問候。我罪奚可補。奔喪不及柩。有靈應見數。就位徒哭泣。攬淚爇香炷。人生莫不穀。姨氏獨無輔。願言又誰恃。悲風發前塢。

雜詩

西山何峻嶒。丹崖萬仞強。我欲徃從之。道路阻且長。
延頸立跂足。怵怵中心傷。安得雙飛翼。乘風起高翔。
美人裁白紵。游子淚霑裳。明月照綺疏。微風忽已涼。
對此一罇酒。絃歌展清商。功名難自棄。努力念大康。

苦寒行

北行太原野。遠道何綿綿。跋涉無所憇。馬足多跼蹙。
悲風日暮發。陰雲蔽山川。雨雪一何盛。泥塗亦既艱。
行聞玄猿哭。止觀猛虎蹲。昏黑忽失路。下馬立長歎。
僕夫疲且病。躊躇莫敢前。殺氣凜冽衣。膚。繒纒不復溫。

哥矣安居者。日舉食萬錢。哀此行役人。孰從具饔飧。
敲石然薪火。刁斗煮粥饘。性命殆難保。號咷呼蒼天。

述懷

喬木倚山側。枝葉鬱葱蘢。細草生道左。寸寸偃勁風。
矧茲流離子。飄颻若轉蓬。懷寶履名途。錯然迷西東。
處世誠多事。進退勞鞠躬。高門何喋喋。無非王與公。
車馬塞九衢。絃歌發深宮。沈湎不自悟。林下泣英雄。
嗚嗚樊中雉。有羨高飛鴻。感激起旋歸。幽憤氣如虹。
俛仰歲聿逝。矯首望崆峒。寧迴青雲念。孩提求童蒙。

早春陪諸君宴牛門護園

孟陬春風起。衆卉擢芳菲。淑氣一何鬱。清江浴朝暉。
 黃鳥遷喬木。顧影刷羽儀。和鳴求其友。翩翩或奮飛。
 願言念君子。晝日款郊扉。邂逅朋盍簪。樂事豈相違。
 主人愛敬客。獻酬不知疲。高堂列歌舞。席上散珠璣。
 春酒旨且多。後厨貯羊肥。琴瑟具在御。痛飲固所宜。
 歲月行蹉跎。攜手與同歸。歡情坐何極。千秋以為期。
 哭東壁二首
 北郭悲風起。振此林木枝。浮雲何黯澹。之子去不歸。

儵忽就冥途。宵耿安可追。冥途漫悠悠。引領徒歎欷。
 昔為同門友。今為異世人。去者固日踈。吾生誰與親。
 晨風鳴北林。翩翩復離群。泣涕零何多。哀心難具陳。

其二

東方有才子。託名翰墨林。弱齡觀群書。談笑橫古今。
 摘藻比左馬。文思一何深。卓犖懷脩能。豈曰無知音。
 早從王孫遊。芳躅誰追尋。步出城北門。遙望商山岑。
 故道何崎嶇。樹木鬱森森。思君安可見。淚下霑我襟。

呈朝鮮申學士

男子生有志。束髮事四方。何況抱脩能。當世稱材良。
揮毫成麗藻。文采不可當。祇役萬里外。載筆從博望。
滄海漫浩浩。道路一何長。弭節扶桑下。容與觀國光。
金罍烹嘉魚。春酒在高堂。願言念君子。無由承管筐。
虞廷重四岳。周室侯太公。華胄豈不遠。苗裔垂無窮。
之子真特秀。翩翩祖宗風。受命參握節。乘槎大海東。
所望在青雲。寧徒尺寸功。維舟浪華津。停車芙蓉峯。
艱險不足畏。惟思皇華穠。嗟爾鞅掌甚。金樽難與同。

呈朝鮮姜書記

呈朝鮮成書記

烈士勞行役。書記一何賢。王事故靡盬。之子獨翩翩。
授簡平臺上。文藻摘當筵。豈愛千金壽。所求在嘉言。
羔裘稱令德。冠服麗且鮮。濯足東海水。振衣扶桑巔。
不厭長途苦。每懷王命尊。小子在東道。愛敬起周旋。

呈朝鮮張書記

邦家貴輯睦。善鄰古所寶。疇哉翰林客。間關行遠道。
秉筆毗專對。辭命獨自草。文章光簡牘。英華達雲表。
寵數豈不多。功名豈不早。朝發崑崙丘。夕宿蓬萊島。

鳳凰翔九天。蛟龍躍靈沼。薄酌北海樽。稱觴以難老。

悼亡詩

并序

余生無有過人之才能。是以年垂四十。未嘗見知於人也。然自束髮。所締交者亦既多矣。於其中蓋得謬知我者三人焉。其一曰中野完翁。長崎人。儒者也。長於我十三歲。其二曰岱北。浪華人。浮屠也。少於我一歲。其三曰淺見氏。婦人也。長於我二十九歲。完翁者。純之少所師事也。完翁嘗言。吾不敢謂有知人之明。但言知德夫。則弗讓於他人。設使

完翁得邦家。必將託六尺之孤。寄百里之命於我矣。其視我也。雖骨肉無以尚之。二十餘年一日也。兆公之於我也。不以其道不同。而交以文章。其愛我。則不以文章而以志。兆公負才倨傲。居常於人鮮所推服。唯獨於純。若有所取焉者然。有聞其與人言。及語其徒曰。吾識儒者多矣。視之所謂儒者。上也。非儒者。下也。若太宰生者。不可特以儒目也。要之非季世之人物也。淺見氏者。門叶君高治之後母也。門叶君與我友。使其二子師事我。淺見氏

既老愛我如子。待我以禮。嘗謂其子婦及孫曰。太宰子非常人也。爾曹善視之。慎勿易之。即有緩急。可以身託之。故門叶君與其妻稻垣氏。遇我甚厚。且謹。自享保丙申。淺見氏歿。其明年。兆公歿于浪華。又三年。完翁歿。五年之內。知我者殲而無遺。哀哉。純以碌碌之資。而國士待之者三人矣。不可謂不遇也。然其人皆不久在世。純未老而盡喪之。則是不幸也。嗚呼。伯牙絕絃。匠石釋斤。誠哉。知己者之難得而易失也。於是乎作悼亡詩三章。

鮑叔知管仲。交情深入神。先施不望報。古來稱絕倫。相知世希有。我乃得若人。膠漆何足道。分同骨肉親。然諾無疑慮。將許七尺身。一旦先我歿。吾生復誰因。知己難再遇。忼慨呼蒼旻。

支遁知荀子。超悟目其能。爲道雖不同。一言真匪輕。相知世希有。我乃得若僧。風徽已莫逆。賞心遂忘形。投分待芳訊。豈曰非良朋。一旦先我歿。吾生于何憑。知己難再遇。歔歔淚縱橫。

陵母知漢王。勅子守臣道。伏劔勵使者。寄聲見懷抱。

相知世希有。我乃得若媪。溫惠愛子客。恭遜忘身老。
砥砢何所取。喜如獲鴻寶。一旦先我歿。吾心獨悄悄。
知己難再遇。揮淚仰穹昊。

七言古

致酒行

身命抑塞君莫愁。一杯取醉萬事休。松江鱸魚蘭陵
酒。滿堂笙歌壽千秋。爲客東西又南北。九原茫茫安
所息。孔父七十終栖栖。蘓秦游說相六國。世上浮石
何足喜。解道禍福如糾纏。君不見北邙山上纍纍塚。

風雨淒其澆叢棘。

牛門集分賦曲名得拾翠樂

春雨昨夜過長安。長安城中春色闌。長安麗人顏如
玉。拾翠鬪芳願相屬。不厭東風吹羅衣。只恐桃李取
次飛。安得王孫與同歸。

鳳泉上人藏六行

泉公卓錫武城隅。塵外風流入畫圖。泉公爲人好閑
居。洒落襟懷與世疎。四海九州徧參過。歸來此地結
草廬。草廬一間足容膝。傲然自比維摩室。署曰藏六

表心曲。取諸龜之藏首。藏尾。藏四足。藏六不用心。自
閑。一身如雲無所屬。君不見天下方袍圓頂幾萬人。
我師穎悟更無倫。性敏早洗侏儻舌。舌端三寸自在
伸。常笑維摩守一默。文殊當時徒逡巡。然則此廬此
室。何惟師藏六。須容三萬二千菩薩日教育。

綠竹歌寄英泉上人

猗嗟美兮綠竹脩。轟其森森兮墨之洲。干青霄兮礙
赤日。白露降兮風颼颼。綠竹之陰兮構禪宮。排幽閨
兮睨太空。深沈兮寥廓。度四時兮樂無窮。猗嗟綠竹

兮鬱葱蘢。直而有節兮君子風。綠兮竹兮可以爲留。
綠兮葉兮可以醺酒。誠知子兮久忘機。矜我狂兮勿
我咎。墨之水兮流其逝。墨川之竹兮其苞無替。濯我
足兮濯我纓。執子之手兮終我世。

觀佐野氏盆中假山引

金峯山上白雲飛。金峯積翠何霏微。奇樹怪石不可
狀。金峯形勝甲邦畿。三月春闌櫻花開。儼若重雲繞
層臺。有時山間微風起。片片如雪滿天涯。山人野客
看不過。心醉神眊徒徘徊。佐翁生長金峯側。探勝尋

幽未曾息。一旦游宦千里外。東都西京幾經歷。鄉關
綿邈風馬牛。白雲無路空相憶。茲石惟肖金峯山。積
翠高出白雲間。一種玩好真可愛。對此欲歌行路難。
却是咫尺足縱目。世上何人似君間。

箜篌引

江上風雨連高秋。江水潺湲向東流。流水一去不復
返。良人遠征使人愁。人生百年半別離。室家歡娛能
幾時。琴瑟靜好空在御。粉黛無施顏色衰。號天噓唏
雙淚落。將歌將哭欲懇誰。此身由來路傍草。一心唯

知以死果。可憐世上輕薄兒。何物夫妻堪偕老。

神巫行

宕丘之山鬱崔嵬。朝雲暮雨去復來。宕丘巫女何姣
麗。弱質婀娜倚高臺。長者二十少二八。恰似芙蓉並
蒂開。金釵玉簪羅衣裳。瓌姿瑋態極容光。耀若白日
照屋宇。皎若明月臨池塘。聯娟雙眉不待畫。花顏豈
假紅粉粧。眇眇已含無限意。一顧斷盡萬人腸。儻遇
吳王便傾國。即入漢宮定專房。清歌妙舞真絕倫。起
雲行雨信有神。城中紛若禱祠者。投與金幣如埃塵。

那知蛾眉能伐性。况復尤物尤傷人。須臾神升歌舞
休。美人歸去不回頭。陽臺夢覺無消息。依舊雲雨繞
宕丘。

五言律

登富嶽

富嶽勞瞻望。登臨喜滿襟。歸雲迷故岫。積雪罩層陰。
目極群山小。心寒列壑深。誰知萬仞上。縹緲發高吟。

小笠原正春過京見訪

同遊鴻鵠飛。喜子顧寒微。刮目稱今是。攢眉數昨非。

尊鱸定甘美。衣馬正輕肥。相見問鄉信。慙慙說早歸。

井原石龕寺

井原山在丹波州冰上郡源義詮常棲此山事見太平記第二十九

卷丙戌九月二十四日同野添方叔等遊馬

經歷丹陽路。來過釋氏居。像靈運慶刻。字古道風書。
一將巢中鳥。三軍網裏魚。星霜千載下。遠客自躊躇。

別忍海師

百里池塘夢。三年踈闊情。論詩成興趣。煮茗話平生。
檐外山花落。牕前野鳥鳴。此時容易別。不是念京城。

秋日過僧院

竹裏諳幽徑。來敲禪寂扉。林間黃葉亂。山見白雲飛。
問法源流遠。論文道理微。更無人世念。盡日欲忘歸。

寄緒方培溪

梁園初好士。俊乂早登庸。功業先臣庶。恩榮及祖宗。
道明書一卷。家富粟千鍾。從此藩籬內。無勞起卧龍。

賀密巖師應總州龍光寺請

師甲州郡內人

峽中飛錫日。遊戲興悠然。鉢向人天拓。衣從佛祖傳。
上方非世諦。下界有機緣。試問度生法。惟參一味禪。

折梅逢驛使

雲山道路長。憐汝歷冰霜。非展仲宣眼。還探何遜腸。
郵筒封素艷。行李帶清香。君看江南信。慙慙天一方。

冬日集蓮光寺得長字

三冬能幾日。相引上高堂。萱草非無色。梅花已有香。
吟詩搔短髮。酌酒洒愁腸。浩歎年華促。寧知一線長。

養疴

養疴北牕下。日夕卧猶高。羸憊求良藥。閑愁愛濁醪。
看書難竟卷。寫字懶揮毫。人世無聊甚。誰堪經濟勞。

早春集牛門分韻得宮字

窈窕江城路。來尋殘雪中。鶯囀高秦樹。霞飛近漢宮。
長歌駐晝景。爛醉帶春風。似是山陰客。相逢興不同。

牛門雨集得雲字

綠陰烟雨裏。把酒對諸君。踈放堪遺世。清狂且出群。
笙仍似鳴鳳。歌自過行雲。高調千秋事。何人可得聞。

同賦潮來天地青得晴字

東南滄海水。漫漫虛復盈。雲收遲日馭。風靜滯舟行。
沙上白鷗起。天邊黃鵠橫。韶光萬里外。渺渺愛春晴。
夜

松門岑寂境。夜色不宜看。月滿空庭冷。風吹落葉寒。
醉來知酒力。讀罷惜燈殘。幽意漫如此。蕭然興亦闌。
將雪有懷

黑雲低欲墮。風景轉霏微。山郭霰先集。江城雪未飛。
親朋情不淺。雞黍約何違。回棹誰家客。無由問所歸。

春過禪院

舊記林間路。逍遙春雨餘。窺園求落蕊。就架閱藏書。
廣座熏香篆。高堂響木魚。因觀清淨理。頓遣俗塵除。

贈次公

故國重賓師。何人最遇知。載歸真特典。引見定多時。
席上千金壽。尊前四牡詩。築臺應不日。莫遣壯心衰。

九月六日諸子集倚蘭臺賦此奉呈主君。

東閣群賢座。西臺太守堂。金風散積雨。玉露欲重陽。
興至詩皆好。尊開酒正香。那知布衣客。爛醉任踈狂。

鶴岡祠

舊國荆榛亂。靈宮此巋然。朱門光照地。翠柏氣參天。
仙鶴歸華表。孤鴻下塔邊。誰家宗社守。爲問治承年。

畫島

渡水陟崔嵬。雲煙渺壯哉。數峯秋樹合。萬里暮潮來。
境近登仙理。人非作賦才。風塵如可脫。何必憶蓬萊。

自鎌倉歸途中口號

結髮慕前修。平生事薄遊。扁舟多蹈海。短褐屢登樓。
腸斷湘山月。神飛函谷秋。後期殊未卜。聊此得忘憂。

晚秋同東壁過飲子遷芙蓉館值風雨作此

湖上秋將暮。何爲君閉扉。風悲荷葉亂。雨急荻花飛。
絃爲知音理。毫因得句揮。豈無高會趣。留飲欲忘歸。

渡邊蒙菴自濱松至攜酒見訪

京華離別後。十載思難裁。吾豈識奇者。君能載酒來。
展迎佳客倒。門為故人開。林下堪留飲。終當乘月回。

送鳳泉上人歸信陽

浮雲無所住。四海任君行。即動歸休念。其如離別情。
接天江水碧。夾路野花明。未遂買山隱。隨緣到化城。

送北村抱節

肥馬看行色。芳樽坐別情。天高秋氣爽。海闊曙光清。
興共歸心動。詩因勝事成。送君遙指點。函嶺白雲橫。

哭馮謙先生二首

昨日歌梁木。今朝失哲人。遺書空倚壁。坐席已生塵。
架插如椽筆。牕懸漉酒巾。從來子平願。已矣九泉身。

其二

青年定交者。之子最相知。折騰何曾恥。推心不復疑。
談論頻抵掌。慷慨屢揚眉。遺愛綈袍在。魂銷永訣時。

五言排律

窮人無所歸。落魄計多違。滿口晏嬰飯。全身閔損衣。
喬松空晚翠。寸草自春暉。大節雖題柱。高歌欲采薇。

鄉關千里遠。親友一封稀。賴有長生術。清時好閉扉。

送大潮禪師歸省西肥作

應化無方所。虛空任去留。十年鄉土念。萬里水雲遊。
大道元高蹈。連城不暝投。襟期兼百氏。才調曠千秋。
文入莊周室。詩輕支遁俦。逃禪同木石。講法茂王侯。
為有倚門望。難忘陟岵憂。扶筇蘓嶺路。發櫂浪華州。
玄澗風偏正。滄溟月共流。布金檀越在。持鉢必芻糲。
徃矣江湖興。歸與竹樹幽。翩然從此去。別意兩悠悠。

迫門祠

日本入謂海口曰迫門。祠在武州金澤。祀二鳥神。

叢祠臨海曲。眺望意無窮。碧水兼天闊。青山接野空。
松杉摧滴露。蘆荻戰含風。翠盡千峯外。潮回萬頃中。
斧斤分鳥道。歌吹徹龍宮。最看乾坤理。不因䟽鑿功。

門人宮田明書

春臺先生紫芝園前稿卷之一 終

春臺先生文集 前集卷三 十一 文苑堂
間關千里入京華。落魄伶俜也足誇。王國經營因地
勢。神州氣象邈天涯。匣中奇寶藏明月。堂上芳樽挹
紫霞。絡繹行人誰似者。自憐遠客獨思家。

浪華

淀水湯湯拂曙流。海門港口敞清秋。四衢大道罨塵
起。萬雉高城旭日浮。鼎食千家藏白壁。絃歌幾處發
青樓。朝來西北堪回望。武庫山遙爽氣稠。

冰上留別野添方叔

田麥青青縣路斜。思君重入舊烟霞。興來頻著登山

屐。獨往時乘下澤車。桃李園中憐夜色。簡編堆裏惜
年華。今朝又是樽前別。腸斷春風吹柳花。

寧樂懷古

南土芒芒古帝城。三條九陌自縱橫。藉田麥秀農人
度。馳道蓬生賈客行。細柳低垂常惹恨。閑花歷亂竟
無情。千年陳跡唯蘭若。日暮呦呦野鹿鳴。

自嘲

傑然清世一遺民。浪跡江湖似隱淪。冉冉顏齡同犬
馬。翩翩才調逐風塵。居恒簡傲思狂者。遲暮寒微背

故人扣角康衢夜歌罷。可憐英氣鬱經綸。

下館丹侯見枉徂。來山房謹賦一律奉呈。

五馬聯翩過里閭。干旄枉顧卧龍廬。下賢不挾冠裳貴。乘興寧嫌供帳疎。調合新詩吟斷處。宴開雅樂奏來初。情深何用煩投轄。隨意淹留長者車。

陪猗蘭藤侯宴牛門荻生氏草堂謹作此奉呈
公子逍遙翰墨林。風流才思鬱森森。當筵忽發陽春曲。進酒時聞大雅音。東府聲名雙白壁。西臺結構萬黃金。自應門下三千客。儻有酬知慷慨心。

岡井伯錫出示東禪萬菴上人詩因同友人和之却寄三首

見說山門臨海開。不知登眺有誰陪。秋高黃鵠穿雲去。夜靜明珠逐月來。百尺檐楹輕魯殿。三通鍾鼓接燕臺。風流何日招提侶。一醉蓮花社裏回。

其二

反宇峨峨海上樓。秋風晚景坐生愁。千家日曝漁人網。萬里雲行賈客舟。蜃氣高低兼水起。龍光遠近共星流。知君披對興無盡。况復平生滯子猷。

其三

新詩傳誦此知君。喜見風流最出群。鷺嶺朝挑滄海日。龍宮暮引太虛雲。無邊色相行中覩。徧界潮音定後聞。不識何時玄度輩。陪筵看取夕陽曛。

西臺侯別筵得人字

平臺賓客此相親。燕筑秦箏發興新。已許盛筵嘗汎灑。兼聞高曲入陽春。一天雲擁文章氣。千里風吹車馬塵。爲是主君多別意。玉杯滿酌漫愁人。

赴鎌倉途中答仲錫見送

步出城門一路漫。長亭西望且凭欄。扶桑初日天光曙。閭闔秋風海色寒。下里何妨遊子唱。南冠定向故人彈。詩來忽發陽春興。不似尋常離別難。

擲筆松

連山枕海似蓬瀛。金澤雲煙畫不成。祠屋幾年秋樹色。寺樓何處暮鐘聲。野人案堵魚鹽利。沙鳥忘機飲啄情。空撫孤松堪自笑。苦吟擲筆等閑行。

登瑞泉寺後山頂。即夢憲國師所創徧界一覽亭之墟。基址猶存云。

夢公禪刹。占名山。風磴嶙峋。不易攀。萬古雪華瞻富
嶽。四時霞彩望函關。丹丘芝長。神仙境。滄海潮來天
地間。臨眺休論人代異。長教過客破愁顏。

鎌倉懷古

穿山涉水苦相尋。盡日扶筇行且吟。露下鶴岡華表
舊。雲歸龜谷樹陰深。地形磊落英雄略。兵氣摧殘億
萬心。父老幸能談故事。幾人回首又披襟。

東睿林光院奉館林侯越知清武

山氣蕭森秋色開。王孫走馬向天台。登臨未問修真

地。侍從先求作賦才。滄海水浮殘日涌。赤城雲帶落
霞來。偶然却忝梁園客。病渴唯思傾一杯。

代人贈韓客

大邦使節氣凌霄。昨日城門四牡驕。漢代賢良元磊
落。梁園賓客豈蕭條。千秋迥對芙蓉雪。萬里遙通渤
海潮。傾蓋羞無束帛贈。木瓜尚爾覓瓊瑤。

酬臣哉訪春臺不遇見寄

朝入都城薄暮歸。空聞嘉客款柴扉。園中草木添春
色。洞口煙霞帶落暉。三徑青苔堪穩坐。一杯濁酒奈

相違為君重引扁舟興。此處林風好拂衣。

答義海上人

方外論文共倚欄。高林寂寂月初團。相逢已恨春宵短。一笑還憐燈火殘。講法青蓮無點染。和歌白雪有餘寒。時名四海歸吾黨。更喜彌天遇道安。

五言絕

早起

高樹猶殘月。無風露滿天。晨鐘聽不盡。叩齒漱寒泉。

八橋故地

茫茫八橋地。曾有王孫過。燕子花零落。人傳五句歌。

同賦俠客得刀字

借軀報睚眦。意氣南山高。唐突五陵客。腰間金錯刀。

七言絕

春日偶成

麗日當天晝景遲。飛蟲處處亂遊絲。好書看盡堪腸斷。無限春愁獨坐時。

梅童子墓

阿梅遺恨滿江濱。四尺孤墳楊柳春。春色不隨時世

改至今猶似少年人。入此對舒聊春春身不對和世

東睿山瑠璃殿

一旦經營結構新。入門何處避紅塵。玉樓金殿高多
少。不庇貧民七尺身。

贈松崎子

大衛騎郎稱四郎左衛門與子默別人

微力難承國士恩。錦衣誰聽布衣言。紛紛世上多狂
客。不把金龜換一樽。

唐崎孤松

蒼龍蟠屈氣崢嶸。寫出瀟湘夜雨情。此地如留玉皇

駕。許君獨擅大夫名。

觀傀儡

東舞南歌巧闢奇。機關不肯使人知。看來世事渾如
此。莫笑周王怒偃師。

感神院木犀

花木生來不向陽。一堆金粟呂秋光。天然幽艷無人
愛。空使西風吹暗香。花譜曰木犀喜陰

遊山寺集句

盡日門前獨看松。李涉僧來不語自鳴鐘。杜甫朱簾

暮捲西山雨。

王勃

峭壁攢峯千萬重。

盧仝

丹陽雨中懷京師

京國春風消息稀。山陰遊子忽思歸。不知昨夜祇林
雨。多少櫻花多少飛。

漫成

客路年年行未休。十分風景九分愁。春來失却青雲
志。準擬江湖伴白鷗。

和田故城

城在丹波州冰上郡。織田氏時。佐野氏邑焉。明智氏滅之。城遂廢云。丁亥

三月既望。同野添方叔等。飲酒于其上。

數里層巒路轉回。雲埋老樹繞崇臺。山花不避兵戈
地。追逐春風點綠苔。

悼忍海上人

流轉無常夢幻身。百年可惜落花春。別來一月問消
息。昨日同遊今古人。

平安因幡堂安藥師佛處也戲題

掌上瑠璃藥一壺。大悲方便濟凡夫。不知十二威神
力。醫得書生貧困無。

贈法霖沙門

異鄉喜見故鄉人。清話忘機無點塵。却怪相逢十年
晚。平安城裏偶爲鄰。

慈照院銀閣

太平時節守成難。豈料兵戈起宴安。兩腋風生銀閣
上。憐君盡日倚闌干。

送僧歸關東

浮雲飛錫一身輕。分手無端別恨生。東路悠悠何日
盡。料君每早履霜行。

送了雲師歸高野

襟裏風光半未開。帝鄉何事等閑回。歸山不負了雲
意。時復無心出岫來。

上元立春

雲物熙熙宿雨收。無邊光景滿皇州。東風忽解人間
凍。併作上元和氣流。

嵯峨看花

川上輕風帶嫩寒。同人相引此盤桓。嵐山春色櫻千
樹。渡月橋邊抱膝看。

再宿大磯

五載重過舊客亭。沙中日暮少人行。終宵蕭索驚魂
夢。半是濤聲半雨聲。

答松崎子默送別

一曲陽關傳玉杯。對君又自覺顏開。却悲身是西遊
客。泣立東隅芝水隈。

過關原

德川流派出英雄。萬世鴻基一戰中。從是四方安堵
者。謳歌朝覲向關東。

丹陽感秋

久客悲秋思故鄉。故鄉水遠更山長。悄然望斷雲生
處。陟岵吟來闕一章。

聞鹿鳴

和鳴入雅正呦呦。滿座嘉賓宴未休。一自猿生題詠
後。詩家町疃解悲秋。

戊子九月。又適丹之和田。新舊慙慙見留。因謀
爲構草堂。邑宰不可。乃止。余遂行。仍謝以詩。

一別京師任旅遊。異鄉故舊苦相留。問閭小吏多猜
忌。欲寄浮生不自由。

贈岡村丈白

舊因詩卷慕高風。雪月吟殘曉夢空。昨日南窗一場話。十分情思酒杯中。

己丑元日

洪鈞一轉物華新。遙向東風壽老親。椒酒醺來多淑氣。如同盤古已前春。

得遠州上山周悅書

一封遠寄好音來。此日山中採葛回。江海春風五百里。猶能吹起客心灰。

悼二村見隆

見隆。紀州田邊人。入京。學醫於下條氏。寶永己丑二月十日。以痘歿。

時年二十。

故人歸去月黃昏。一片愁雲掩郭門。陌上狂風杏花落。不知何處覓遊魂。

為上山周悅題龍谷寺棟

寶永己丑春三月。上方再開獅子窟。龍谷精舍真金田。時有須達為檀越。

訪洞玄子不遇

洞裏清談久不聞。黃梅時節更思君。入門堪恨朝元

去空負江東日暮雲。

中秋

百尺高樓巧耐寒。佳人終夕倚闌干。吾生不負中秋月。只是年年愁裏看。

將往難波過第五橋

客舍平安五六年。獨行獨坐愛林泉。遲遲過盡河橋去。落日回頭大佛前。

讀彥岑上人林間錄其徒岱北所輯也。

文字縱橫珠走盤。高僧真實在毫端。貝多結集誰傳

後。五百人中一阿難。

送仙桂師赴作州袋山之請

一鉢隨緣遊異邦。今朝欲別露橫江。袋山聞說真禪利。好爲人天樹法幢。

有馬遇雨贈逆旅主人。

高卧西軒客夢殘。山中永日雨漫漫。蕭然旅况誰相問。唯有主人青眼看。

九月十三夜對月有懷

霜降東籬菊半殘。陰螿鳴砌夜初寒。可憐百里西江

月。唯有問人獨坐看。

示折花人

園裏春殘恨有餘。新枝折盡舊枝疎。莫言草木無情物。老父無情却過渠。

辛卯中秋

萬里西風宿雨收。騷人何處復登樓。十年看盡他鄉月。不若庭闈一夜秋。

九日

鄉鄰自節笑顏開。獨侍親闈把一杯。莫道黃花不堪

摘籬邊時有白衣來。

九月十三夜蓮光寺方丈翫月呈卓上人

樹色蒼蒼秋正深。高堂邀月轉沉沉。對君盡夕無愁思。一任寒螿傍砌吟。

九月十三夜對月。是日偶得冰上野添方叔書。

有懷舊遊

高林滴露月初明。雲際遙聞鴈一聲。記得山陰田舍夜。團欒剝栗到三更。

題僧舍壁

寶鴨香銷午夢殘。長林風露覺微寒。南牕寄傲無塵事。閑把架頭詩卷看。

冬日訪岱北師寓居

曝背南軒近午時。不因雪月也相思。莫言城市無佳致。纔訪君來便得詩。

夜過僧院

夜月經過古法筵。偶然參得趙州禪。困來就睡無人覺。一點青燈照佛前。

哀京僧毅仲

京僧弘字毅仲。號玉山。正德癸巳閏五月二十日歿。年二十五。

騷壇攜手感相知。巾笥空留數卷書。二十五年奄忽別。江城煙雨落梅時。

平安四時樂

遲遲春日平安城。萬樹櫻花照眼明。盛宴高樓絲竹發。林風斷續郢歌聲。

濯熱追涼鴨水邊。水邊華屋貯嬋娟。清歌妙舞燈光裏。醉殺平安美少年。

千金一擲任間遊。黃葉飄零白露秋。橫笛聲悲酒還醒。月高又去上青樓。

平安雪後好風光。詞人酒客滿高堂。借問今朝誰奏賦。相如依舊侍梁王。

送人之丹後州

知向山陰把釣竿。天橋中斷上天難。北溟波浪鯤將化。余謝津頭試且看。

送人之日州二首

萬里公程定若爲。壯心初不負男兒。到州試看扶桑日。猶似興王赫怒時。

其二

悵望天涯物候新。驪駒唱罷苦傷春。來時若聽漸離筑。爲問前朝字惡人。

過東壁著園。余時坐首疾止酒。故有後作。

一叢苦竹雜桑麻。衡宇相望小徑斜。莫道席門過客少。却從轍跡到君家。

其二

名比相如傾蜀都。邑人徃徃識當壚。恐緣不飲堪君怪。且據胡牀奏酒胡。

倚蘭君侯將之國。就牛門與諸子別。分韻得山

字。

紫氣侵晨欲出關。離筵琴調入高山。因思到日西臺望。長在金峯積翠間。

賦得莫愁樂分韻金字

少年場裏擲千金。飲馬江邊秋水深。謾向盧家問消息。可能相看不傷心。

同賦梅花落得梅字

悲絲急管兩相催。杳杳春雲繞楚臺。莫向晚風吹玉笛。無端落盡後園梅。

從軍行得鮮字

旌旗十萬向燕然。列幕沙場且擊鮮。此日何人射鵰手。暮雲斷處見秋天。

秋日牛門小集得秋字

高堂詩興動清秋。樹上寒蟬噪不休。滿座爭傾十千酒。涼風已度白蘋洲。

同前得山字

一片孤雲飛鳥還。赤城霞彩映西山。酒徒終是悲秋客。却恐清風吹醉顏。

遊蕪迷賞花得山字

蘇迷春色出塵寰。見說桃源在此間。若解看花能避世。何人辛苦入深山。

春日牛門小集。諸君阻雨多不至。得春字。

瓊筵邀客絕埃塵。風雨漫漫多滯人。爲問杏花壇上子。絃歌何處約三春。

懷浪華北上人二首

憶昨相攜過虎溪。廬山三月鳥空啼。春光不見袈裟影。一片白雲千里西。

其二

江上春風酒半醒。胡笳三弄雨淋鈴。分明曲裏相思切。總與傍人垂淚聽。北公向惠鵝殿蘆管。余用爲篳篥義嘴。

不寐

病中獨夜不曾眠。鼓響城樓又曉天。空羨南華胡蝶夢。翩翩只在漆園邊。

送蔚宗遊函嶺

雲白天高爽氣微。壯遊得意幾時歸。送君一曲關山月。夜半翩翩傍馬飛。

九月六日西臺邨集分韻得黃字

雨過西城草木黃。滿天秋色映高堂。菊花不待重陽日。先發使君樽酒傍。

弘明與東壁君彝及根本生父子攜酒登山。有醫生宜泉者。懷菊與梅花來。泛諸杯中。東壁偶記周南梅開杯事。因成一絕見示。有和。

豈謂秋風發野梅。黃花自是傍籬開。應嫌橫笛謾吹落。分送清香在酒杯。

贈根本翁

驛路悠悠村路斜。弘明寺畔是君家。經行堪詫山川勝。况乃杯中醉菊花。

擲筆松下同東壁吹笛。山井生存焉。偶有貴婦徒從甚衆。自東都來遊。餽茶果以犒我三人者。

東壁戲賦一絕。余和之。

擲筆松風入客裝。更逢擲果笛聲傷。據牀却愧將蓬累。准擬車中白面郎。

建長寺

松寺深沉鎖薜蘿。杖藜相訪試經過。高樓鐘響紺園

晚。滿目悲風落葉多。
門外潺湲溪水流。鹿山風景不勝秋。上方終日無人語。落木蕭蕭送客愁。

圓覺寺

獨騎鷹揚定大東。千秋霸業壯關中。繁華銷盡青山下。禾黍離離戰晚風。

賴朝故宮

故東光寺墟有地牢。兵部王護良囚且死所也。有感而作。

茸茸蘿薜掩巖扉。俠骨銷亡何處歸。松下踟躕腸欲斷。不知霜露濕人衣。

寶戒寺

九月霜飛樹色空。江山何處訪英雄。西風吹盡歌鐘響。黯澹秋雲繞梵宮。

暮登光明寺後山眺望

夕陽海上暮天晴。滿目微茫漁火明。畫裏青山看不見。但聞旅鴈作秋聲。

稻叢懷古

沙汀南望浩煙波。聞道三軍自此過。潮水歸來人事改。空山迢遞夕陽多。

春日奉陪西臺侯遊泰叡山後院得山字
櫻桃花下醉開顏。傾倒金樽未肯還。爲是君侯夢神女。無心雲雨滿驪山。

牛門奉惜猗蘭君侯別得頭字
離堂絲管動林丘。落日清風近素秋。蘇嶺白雲誰與度。知君馬上重回頭。

憶東壁

深深雲樹繞商丘。玉笛飛聲似欲秋。月滿關山君不見。淒然獨夜使人愁。

呈朝鮮申著作

使節東馳萬里餘。鴻臚新駐大夫車。峨峨冠蓋如雲集。誰是蘭臺行秘書。

再次原韻酬申著作見和

盡日論文意有餘。滿堂好事未回車。太玄草就多奇字。夜半休繙天祿書。

呈朝鮮姜書記

青袍白馬任追陪。健筆偏稱書記才。自是茂陵遊未倦。知君授簡在平臺。

次原韻酬姜書記見和

千秋高會喜趨陪。書記誰爭阮瑀才。見說大邦多有識。嘉名從此上蘭臺。

呈朝鮮成書記

翠虛成琬。天和之聘。以製述來。夢良其從子也。

翠虛名譽九天高。玉樹庭階有鳳毛。紫綬金章豈難覓。眼前先已著青袍。

次原韻酬成書記見和

知君才氣競名高。雲際飄然一羽毛。好向扶桑枝上

宿。昔時明月照藍袍。

夢良詩曰。扶桑月色渾如舊。自註家叔東遊時。有月出扶桑大

樹間之句。未句云云。

呈朝鮮張書記

三韓使節入青雲。上國文章愜素聞。書記翩翩老辭命。東方千騎不如君。

次原韻酬張書記見和

才子揮毫起彩雲。郢中高調又堪聞。風流千古空相憶。豈料如今此遇君。

贈朝鮮鄭裨將

壯士乘槎護玉珂。幾回欸乃雜饒歌。將軍威武兼才調。意氣應輕馬伏波。

次原韻酬鄭裨將見和

大邦冠冕各鳴珂。不用西歸奏凱歌。休遣將軍重橫槊。近來東海絕風波。

代人贈韓客

使臺賓從盡才賢。摘藻誰人不掞天。紅日高懸青鎖闥。知君屢奏白雲篇。

同前

星使乘槎日本秋。請看鼉背十洲浮。明珠縱在鮫人室。我向驪龍領下求。

送安藤奎州還大垣三首

醉向江邊離思紛。西風千里似邀君。高秋何物堪瞻望。岐阜山頭一片雲。

其二

斗間紫氣照豐城。今日龍泉空有名。匣裏太阿君自愛。莫衝雲雨渡延平。

其三

人間大藥滿青囊。自是君家傳禁方。五十三亭多舍客。近來更遇幾長桑。

贈山縣次公四首

愛汝青袍正稱身。西風躍馬起清塵。十年重下牛門榻。更見逢迎倒屣人。

其二

東路間關匹馬嘶。知君回首望山西。西風何必生鄉思。曾向昇仙橋上題。

其三

韓使當年尋舊盟。昂然各據五言城。東方千騎操觚士。何似周南一縣生。

其四

男兒丁壯動離羣。今日傳杯始識君。邂逅千秋須盡醉。回頭人世似浮雲。

門人宮田明書

春臺先生紫芝園前稿卷之二

終

